



SAOPĆENJE ZA JAVNOST

XII javna debata "Počinitelji i žrtve vršnjačkog nasilja i maloljetničkog prijestupništva su naša djeca-spriječimo vršnjačko nasilje i maloljetničko prijestupništvo"

Centar za kulturu dijaloga je 8.1.2016. godine organizirao XII javnu debatu "Počinitelji i žrtve vršnjačkog nasilja i maloljetničkog prijestupništva su naša djeca-spriječimo vršnjačko nasilje i maloljetničko prijestupništvo". Nažalost, iako je poziv za debatu upućen svim nadležnim institucijama koje su involvirane u rješavanje ovog problema veliki broj nadležnih (vladinih) institucija se oglušio na poziv.

Želimo istaći da CKD nikada nije, niti će organizirati bilo kakvu javnu debatu kojom će stvarati ili produbljivati jaz između vladinog i nevladinog sektora, kojom će prozivati samo određene političke partije, kojom će po svaku cijenu tražiti smjene i ostavke po hitnom postupku. To nije niti smije biti apriorni zadatak nevladinog sektora. Upravo, kako je navedeno u pozivu za javnu debatu, CKD je i na ovoj debati otvarao, ali će i na svakoj narednoj, uvijek i nanovo otvarati prostor za uspostavljanje dijaloga između ova dva sektora. Kritika, konstruktivna kritika, na račun svih involviranih u problem, je jedini put ka rješavanju problema. Ne samo na račun vladinih institucija nego svih. Uputiti kritiku nekoj organizaciji ili instituciji nije, niti smije biti, povod za bojkot, za odbijanje učešća u radu javnog skupa, za širenje negativnog ozračja, jer javne debate imaju za cilj upravo da propitaju mjesta pukotina u vezi sa određenim problemom. Kritici nisu niti smiju biti podložne samo vladine institucije, nego sve institucije kojih se problem tiče. Debatom se problem ne rješava niti se može riješiti, nego se, uz puno uvažavanje svih sudionika, propituju svi aspekti problema i nitko nema, niti smije da ima, privilegiran status u tom procesu. Nitko nema niti smije da ima monopol na istinu. Ekstremisti, posebno ekstremni građanski aktivisti, traže smjene, odbijaju da komuniciraju sa neistomišljenicima i nastoje da razobličavaju vladin sektor po svaku cijenu. Takav pristup nikako i ni na koji način ne vodi do rješavanja problema. Stoga, cilj današnje debate nije bio svrgnuti vlast, kako su u jednom trenutku neki od prisutnih predlagali, nego prepoznati ključne tačke na kojima se u ovom trenutku nalazi najveći problem koji se odnosi, ne na sve i svašta, nego na vršnjačko nasilje i maloljetničko prijestupništvo. S tim u vezi organizator je sa prisutnim učesnicima debate kreirao zaključke i prijedloge za promjene koje stavljamo na znanje javnosti i svim nadležnim institucijama.

Zaključci i preporuke:

Sektor zdravstva: Učiniti sve da se ispuni obligacija prijavljivanja slučajeva zlostavljanja, vršnjačkog i u porodici, dostavi školama, Ministarstvu unutrašnjih poslova i nadležnom Centru za socijalni rad

- Rad na prevenciji nasilja u školama: U školama treba početi raditi multidisciplinarno i sistemski, uključiti roditelje mnogo više u život škole, jer suradnja sa njima nedostaje.
- Vratiti odgojnu ulogu školama!
- Predložiti izmjene Zakona o zaštiti i postupanju sa djecom i maloljetnicima u krivičnom postupku. Zakon ne predviđa sankcije za roditelje maloljetnih počinitelja, ali treba sankcionirati i nastavnike koji ne prijavljuju nasilje.
- Ne postoji sistemsko praćenje vršnjačkog nasilja i prijestupništva. Nisu dovoljna povremena istraživanja, potreban je kontinuirani monitoring i potpuna statistika.
- Nastaviti senzibilizirati policiju kako da radi sa maloljetnim nasilnicima.
- Provjeriti implementaciju predizbornih obećanja i platformi političkih stranaka koji se odnose na mlade ljude.

- Vratiti Prosvjetno-pedagoške zavode u punu funkciju, ali u reformiranoj ulozi i kapacitetu. Prijedlog je i da se konstitira i Prosvjetno-pedagoški zavod na federalnom nivou koji bi objedinjavao rad kantonalnih prosvjetno-pedagoških zavoda.
- Povećati broj prosvjetnih inspektora općenito ali i educiranih prosvjetnih inspektora, jer trenutno na području Kantona Sarajevo djeluje samo jedan.
- Pojačati angažman psihologa, pedagoga, socijalnih pedagoga i socijalnih radnika u školama, ali i intenzitet rada sa učenicima. Ne treba raditi isključivo po incidentu, nego i preventivno.
- Promijeniti odredbe kojima se nastavnik bira na određeno radno vrijeme u školama.
- Učenike upoznati sa svim mehanizmima zaštite, po UNICEF-ovom modelu „Škola po mjeri djeteta“.
- Ažurirati "Protokol o postupanju u situacijama nasilja u školi" za prevenciju vršnjačkog nasilja, primijeniti ga u praksi i bolje informirati učenike i roditelje sa mjerama koje škola može poduzeti i poduzima u slučaju nasilja.
- Dati svakovrsnu podršku nastavnicima koji rade u školama, ne upućivati samo javne kritike na njihov rad.
- Aktualizirati i ojačati ulogu Vijeća roditelja i učenika u školama.
- Ojačati andragoški rad, posebno kada su u pitanju roditelji.

Naknadni zaključak:

- Istaknuti odgovornost medija za formiranje ličnosti mladih ljudi i prilagoditi njihovu ulogu promoviranju pozitivnih vrijednosti

